

## Hibru

### *Anut Nanun san yaŋan tubun a*

<sup>1</sup> Wagam na mok profet adi awad lo Anut id tubud baged ru irupidai se ya, saen wei mi agod dal sensen lo in̄ ago igane ya.

<sup>2</sup> Gug gamu nal wadan en lo man in̄sinan Nanun awan lo irupaiad a. In̄sen lo mok Anut mel fidian igane ya, agod Anut sen in̄ murnap mel an fidian taman imado wo ipiliani a.

<sup>3</sup> In̄sen in̄ Anut san lilaman in̄ lo yen dan isapudadeg Anut san girager tubun an kuai te ikubiai tile ya. In̄san bunun an nek Anut sinan bunun mok igo ya. Agod in̄sinan ru dabai an nam mel fidian igane ilasag yen yau da. In̄ tamolpein sad aupasek isuas yau san dal ikubuneg itout a, ago gug in̄ kumaen panu lo Anut lak na yak in̄anen banin won ak lo imasig imado ya.

### *Nanun san yaŋak eŋel sad yaŋak irin̄ani a*

<sup>4</sup> Anut yaŋak Nanun ipani an uyanan mok a. Yaŋak an eŋel adi sad yaŋak dam irin̄ani a. Nek ago mi Anut Nanun ipilianig dabai tubun eŋel sad dabai irin̄anai ak ipani a.

<sup>5</sup> Anut eŋel ta irupeig ibol,  
 “On̄ n̄aineg nanug, agod gamu n̄ai on̄ane tama.”  
 In̄ ta ago ibol na ya. Agod fon eŋel ta nin̄en ago ibol,  
 “N̄ai in̄san taman n̄umado dop  
 in̄ n̄aisag nanuk imado wa.”  
 An dam ta ibol na ya.

<sup>6</sup> Gug saen Anut Nanun matu an iganeg tan na ipalu an ninen o ago ibol,  
 “Anut san eñel adi fidian in ninen o ubou an dile wa.”

<sup>7</sup> Aria, eñel adi sed ninedi wo man Anut ibol,  
 “Anut inanen eñel adi man tim igo woñ a,  
 inanen urat pinein adi man yai balen imasa dak igo woñ a.”

<sup>8</sup> Ak man Nanun ninen o ago ibol,  
 “O Anut, onsa Kin san kalik an pempem yen yau san a.  
 Agod Kin san makud bani lo wabi dan an kagin itaot san makud igo woñ a.

<sup>9</sup> On kagin itaot ak ninen o mi umat da, agod kagin saian ak umoi geig da.  
 Fun amaiak ninen o Anut, in onane Anut, onane tura murou sad malan te iginio ya,  
 agod yousai san gureñ an on tini fo ikulmaek idu ya.”

<sup>10</sup> Anut Nanun irupei dag ibol,  
 “O Tubun en, fun lo mok on tan en san kadañ guni a,  
 mel fidian lak na yan dam onse bani lo diri a.

<sup>11</sup> Mel an fidian dideg diau a, gug on man mado wa,  
 in yamel wagam ak itout yau igo woñ a.

<sup>12</sup> On nek ibol yamel dululumip diabi yau ak igo woñ mel fidian lak na yan, tan en lo dam ago gane wa.

Nek ibol yamel wagam ak dupasip foun ak digane dak igo woñ, on mel fidian bilisap foun ak dilasa wa.

Gug on man igo pempem mado wa,  
 onsa anañar itout san tia ya.”

<sup>13</sup> En dugo, Anut enjel ta irupeig ago ibol,  
 “Onj njasag aben malan te yak ate mado dop  
 njai onjane ager adi njidiraip paen na dumado wa,”  
 Anut ru ta ago ibol man tia ya.

<sup>14</sup> Enjel adi an enso mel ta i? Inj man ur, amaiak  
 Anut idinaig tamolpein a patud ipasi san amaiak  
 dibinawai o dudu ya.

## 2

### *Anut injiliad an mel tubun a*

<sup>1</sup> Fun amaiak ninjen o id ru rumok a talonj an tabi  
 sakar a, ago dop an lo na id tadeg tau san tia ya.

<sup>2</sup> Tubud baged adi wagam enjel awad lo kubiaen  
 san ru dijnane ya. Ru dulonj an yen sakar da, fun  
 an ninjen o talpein enti aupasek ta igane, tia, awa  
 parsisalek ta igane tap, kulob an san naon atem  
 itaot injane wa.

<sup>3</sup> Fun amaiak ninjen o id patu pasek uyanan en  
 patud tupani tap, en dugo wonj id aupasek naon  
 an tabi-rinjani wak i? Tubun en injen malan malan  
 mok patu pasek ninjen o ibol ilasa ya, agod a inj  
 awan dulonj an id dukubiai tile yak ru an ru rumok  
 a.

<sup>4</sup> Saen nek an lo mi Anut tamolpein a mel malad  
 nam dile amaiak inj sad ru an dabai ipani. Inj kulob  
 girager agod urat dabai tutubun ak igane na ya,  
 agod injen ilon ibol ak lo mi Awan Urgan san dabai  
 lo inj urat digane san bar funfun iwae pidinai a.

### *Jesus sen imug injiliad a*

<sup>5</sup> Man dugo, Anut inj enjel adi tan foun murna  
 ilasa wan kagin dupani wo ta ipilianai na ya. Tan  
 amaiak ninjen o njai ru njabol da.

<sup>6</sup> Gug Anut san girek ta lo ru en igo ibol,  
 “Tamol man nek mel kawan ak igo ya, amaiak  
 ninen o, ata wo in o ilo isou di?

Tamol nanun man in mel tubun tia ya, an ninen o  
 on ata wo in kagin pani uyan di?

<sup>7</sup> On saen katukan mi in enel paed na gane ya,  
 agog in girager yanak tubun ak da pani a,

<sup>8</sup> agod mel fidian in taman imado wo tuon lo diri  
 a.”

Aria, saen Anut tamol igane yan, in mel fidian sad  
 taman imado wo ago ibol a, an lo in mel ta ibiseip  
 tamol san kagin panek patun fo yen man tia ya. Ak  
 man gamu saen en lo man tamolpein mel fidian  
 kagin dupani dop id tile man tia ya.

<sup>9</sup> Gug id Jesus mi tile da, in saen katukan mi Anut  
 in enel paed na imado wo igane ya. Agod ilo  
 munanek Anut ipanad dan ninen o in tamolpein  
 fidian abed inane mater ile ya. Mater an lo na in  
 madai ikubiani a, fun an ninen o gamu id tile yak  
 in yanak tubun ak girager da inane ya.

<sup>10</sup> Nek uyan ak Anut in mel fidian idirig ago dien  
 diau dan, Jesus madai isini an lo in igane itaot  
 mok ilasa ya. Nek an lo in nanuk wei mi inal ipalup  
 insan girager an lo in da sisem dumado wa. Man  
 ata wo? Jesus sen in patun pasek san fun.

<sup>11</sup> Ta a tamolpein gun dilasa wo igane dan, agod  
 tamolpein a gun dilasa yan, in sisem fudi kisaek  
 a. Fun amaiak ninen o Jesus in tein taon ibol san  
 ninen o miai ta ifuni da.

<sup>12</sup> In Anut ninen o ago ibol da,  
 “Nai onsa yan an teig taog nurupidai dulon a,  
 insad tumanek lo nai bar nabi dop on yan nabis  
 wa.”

<sup>13</sup> Inj dam ago ibol,

“Njai Anut tinig nupanig njamado da,”  
agod inj fon ibol,

“Njai ebo Anut nanun muroun ipanag emaiak dida  
mumado da.”

<sup>14</sup> Injsan nanun muroun en man inj tan en san tamolpein mi, fun amaiak ninjen o nek inj dumado dan ago mi Jesus dam injsan tinin, tan en san tinik igo wonj ilasa ya. Inj ago igane yan lo injsan matej lo Satan matej san dabai aman da yan ka ipitini wa.

<sup>15</sup> Dal emaiak lo inj tamolpein injaned matej san rirek lo patud ipasig maror ipidinai a, inj fon matej san rirek injaned madok lo kagin ipidinai yau san tia ya.

<sup>16</sup> Id talonj ak mel an man rumok a, man dugo, inj enjel ta ibinawai na ya, tia, inj Abraham san sawar ibinawai a.

<sup>17</sup> Ago yak ninjen injanen kagin naok naok lo inj tein taon dumado dak ago mok ilasa wa. Ago dop an lo na inj injaned pris malan te yak ilasap ago imado wa. Injsan urat awan lo Anut ibinawi dan igo ya, inj awa yabek tamol agod ilo munjanek tamol an lo inj tamolpein sad aupasek an ninjen Anut ilon igane ibubarum a.

<sup>18</sup> Injsen aupasek san ate suek lo itur go madai ikubiani a, fun amaiak ninjen o inj gamu tamolpein a aupasek san ate suek dile dan ka ibinawai uyan a.

### 3

*Jesus san yanjak tubun an Moses yanjan irinjani a*

<sup>1</sup> An ninen o an naineg teig taog gun ak, an man da Anut san wagin an lo itumanad go tumado dan, an Jesus ninen o mi ilom isou a. In aposel agod in pris malan te yak an ninen o tabol ilasa da.

<sup>2</sup> In Talpein a ipiliani an awan iri pani a, nek ibol Moses Anut awan kagin ipanig Anut san ab ilon lo urat igane igo ya.

<sup>3</sup> Nek ibol tamol ab yabi an yanan tubun dugo ab mok sen man yanan tusan ak ago ya.

<sup>4</sup> Rumok, ab fidian kisaek kisaek atem tamol diabi da, ak man Anut sen in mel fidian idirai an irinjanai a.

<sup>5</sup> Moses in Anut anen ab san tamolpein fidian lulunad lo urat pinein igo Anut awan iri panig urat igane ya. Nek mel amaiak saen murnap ilasa dan te dop ru a in ninen dubol an Moses dam gubak mi ninen o ibol ilasa ya.

<sup>6</sup> Ak man Kristus in Anut Nanun mok imado ya, an lo in Anut san ab lo tamolpein kagin ipidinai a. Id dabai amad da Anut anen ru tabol dan, id ilo uyan amad da mel a Anut ipanad ak ninen o ilod yen dan tabi sakar tap, id Anut san ab mok a.

<sup>7</sup> Amaiak ninen o nek ibol Awan Urgun gubak mi ibol ago,

“Nek gamu en, an in san awan alon tap,

<sup>8</sup> ananem bubem aganep sakar ilasa amoi.

Nek ibol wagam an tubum bagem bitinaek san saen lo tan kawan ak ate Anut patud dupani ago mi,

an kagin an ta agane na wa.

<sup>9</sup> Saen an lo in nai tuog lo bitinaek an diganeg dukubianag se ya.

Ananjar 40 n̄aisag urat dabai fidian n̄igane an dile bo man n̄ai patud dupanag se ya.

10 Fun amaiak ninen n̄ai in̄ nin̄edi wo tin̄aeg saian go ago n̄abol,

‘In̄sad bubed lo in̄ pempem dal senamo diau da, agod in̄ n̄aisag dal dugo won̄ n̄au dan ta dulon̄ na ya.’

11 N̄aisag tin̄ae saiak lo geg sakar ak n̄igane yan, ago n̄abol,

‘Rumok lak na, in̄ n̄aisag yaes bilabal lo ta mok diladu na wa.’ ”

12 An ninen n̄ai teig taog, kagin agane wa. Kabelan an̄ lulun̄am lo ta in̄ buben ilo sou saian aman dap, ilon lo rumok tiap, Anut kumaen pempem san an patun ipani banau.

13 Tia, nal fidian an̄ tan suek ru nug arupei, nal “gamu” dubol dan lo an̄ ago agane wa. Kabelan aupasek san kagin irawan̄ dop an̄ lulun̄am lo ta bubem afutani banau.

14 Ilo rumok malan malan an id fun tiganeg an tabi sakar pe yaup wadan na idu tap, an lo id Kristus da sisem tutumani wa.

15 Id talon̄ ak ru e Anut Dawid ipani yen yen geig da, an ago ibol,

“Nek gamu en, an̄ in̄san awan alon̄ tap, an̄anem bubem aganep sakar ilasa amoi.

Nek ibol wagam an̄ tubum bagem bitinaek san saen lo tan kawan ak ate Anut patud dupani ago mi,

an̄ kagin an ta agane na wa.”

16 En sauta wagam Anut awan dulon̄ gug awa parsisalek digane i? An tamolpein wagam Moses in̄jal go Igipta tan dibiseig diau ama ya.

<sup>17</sup> En sauta ananjar 40 in Anut tinjae saiak dupani se i? An tamolpein a aupasek diganeg dumat go sad susanud tan kawan ak ate dudu ama ya.

<sup>18</sup> Agod en sauta ninedi wo Anut rumok lak na yaes bilabal lo diladu san tia ago ibol irupidai i? An tamolpein a in awan duparsisali ama ya.

<sup>19</sup> An ninen o id tile talon ak in diladu san tia ya, man dugo, in ilod lo ta rumok na ya.

## 4

### *Anut san tamolpein in san yaes bilabal lo diladu wa*

<sup>1</sup> Aria, id Anut san yaes bilabal lo tiladu san ru gubak mi yen la ya. Fun amaiak ninen o id man tarut dop tarer a. Kabelan Anut an aenta lulunam lo ta bitinaek lo idiran pe, an in san yaes bilabal lo aladu san arinani banau.

<sup>2</sup> Rumok, Anut ru id giraned na ipalu yan, nek gubak mi in giraned na ipalu yak igo mi a. Gug ru a dulon an ta ibinawai na ya. Man dugo, rumok in ru an dulon a, ago gug in ilod lo ta rumok na dan lo ru an nunon ta ifu na ya.

<sup>3</sup> Id ilod lo rumok an mi yaes bilabal amaiak lo tiladu wa. Nek ibol in ibol ak igo,

“Naisag tinjae saiak lo geg sakar ak niganeyan, ago nabol,

‘Rumok lak na, in naisag yaes bilabal lo ta mok diladu na wa.’”

Saen Anut tan en igane yan lo in san urat fidian igane itout a. An ninen o id talon ak, Anut san yaes bilabal yen la ya.

<sup>4</sup> Man dugo, girek ta lo in nal seven ninen o igo ibol,

“Anut nal seven lo inʒanen urat an fidian niʒedi wo yaes ibal a.”

<sup>5</sup> Agod fon girek kisaek en lo igo ibol, “inʒ nʒaisag yaes bilabal lo ta mok diladu na wa.”

<sup>6</sup> Amaiak niʒen o id tile dak aenta diladu san dal ipasig yen da, ak man aenta a gubak mi Anut ru diʒane yan diladu san dal diriʒani da, man dugo, inʒ awa parsisalek tinadi a.

<sup>7</sup> Fun an niʒen o inʒ fon mi nal itaot ipiliani a, “gamu en”, ata wo, Anut tan iganeg saen milaen mok gug Dawid awan lo igo ibol,

“Nek gamu en, anʒ inʒsan awan alonʒ tap, anʒanem bubem aganep sakar ilasa amoi.”

<sup>8</sup> Rumok, Josua inʒ yaes ka ipidinai tap, Anut mur-nap fon mi nal sen ak niʒen o ibol san tia wa.

<sup>9</sup> Fun amaiak niʒen o yaes bilabal bageu san Anut anen tamolpein niʒedi wo yen da, yaes bilabal an nal seven san igo ya.

<sup>10</sup> Man dugo, ensauta Anut san yaes bilabal lo diladu dan inʒaned urat tan en lo digane yan dibisei da, nek ibol Anut inʒsen urat a igane dan ibisei ak igo mi a.

<sup>11</sup> An niʒen o id yaes bilabal amaiak lo tiladu wo urat wagai tigane wa. Ago dop aenta luluʒad lo awa parsisalek kagin naok an lo diau dudu banau.

<sup>12</sup> Anut san ru man kumaen a, agod dabai aman da ago yen da. Nek ibol bubarek kisaek malan uraru aman da yak igo woʒ, an talpein tinin isuep iladu yau geig da, inʒsan nʒutun ur da ibiatai da, tatu batek dam titiʒaem igilep sensen dilasa wa. Agod bubed san kankan inʒ ilo girek da ka ikubiani san ilonʒ da.

<sup>13</sup> Agod in malan lo talpein ta imianuk san tia ya. Tia, enti id ru naon tupani san in malan lo man, mel fidian walal te mi itufalak go dien da.

*Jesus sen idsad pris malan te ya*

<sup>14</sup> Id pris malan te tutubun ak amad da ya, an ninen o in lak na yaug, id Anut san na tau san dal yabirubeg iladu ya, an man nek Jesus, Anut inanen Nanun. Amaiak ninen o id ilo rumok san ru tabol ilasa san tabip sakar a.

<sup>15</sup> Dugo, idaned pris malan te tubun ak idsad muruan funfun ninen o ilo munanek ipanad san ta idaisuda na yak i? Tia, in tamol naok ago tia ya. Man dugu, bitinaek naon funfun id lo ipalu dan ago mi in lo dam yau da, ago gug in aupasek ta igane man tia ya.

<sup>16</sup> An ninen o id pempem Anut san kalik giranen na tau a, ante man Anut ilo panek iwae san aben mi a. Aben an lo saen muruan sumeik ipanad dan, ilo munanek ka tinane wa, agod in san ilo panek id ibinawad san tile wa.

## 5

<sup>1</sup> Pris malan te yan kisaek kisaek tamol luluḡad lo Anut ipiliani a. Agod in san urat man, tamolpein waged lo lou kawan ak in mel mudan a yai lo dumari san da, idsad aupasek ipasi yau wo Anut ipani da.

<sup>2</sup> In tamolpein a ilod tia yan, agod a dal diapitilip sen diau dan dam mos nam kagin ka ipidinai a, man dugu, in dam dabai aman tia yan lo yau idu da.

<sup>3</sup> Fun amaiak ninen o, in malan malan man in sinan aupasek isuas san ninen o yai igane wa.

Agop murna man tamolpein sad aupasek niñen o dam yai ka igane wa.

<sup>4</sup> Pris malan te yak in yañan anda ya, ago gug talpein ta sen ilon nam urat an inane san tia ya. Tia, Anut talpein an imug iwagin a, nek ibol wagam Moses tein Aron iwagig pris malan te ilasa yak igo mi a.

<sup>5</sup> Nek ago mi Kristus dam in sen tinin nam pris malan te yak imado wo ta igane na ya. Tia, enti a in irupeig igo ibol,  
 “On ñaineg Nanuk,  
 agod gamu en ñai onane Tama ñumado da,”  
 amaiak Kristus ipiliani a.

<sup>6</sup> Agod girek ta lo fon igo ibol,

“On pris pempem san,  
 on pris naok Melkisedek imado yak igo, on dam mado wa.”

<sup>7</sup> Saen Jesus tan na imado se yan, inanen gudanek lo pempem imosiai dugo, awan tubun mi tinañ iganeg Anut o maten san dabai lo ka patun ipasi wo igudani a. Agod in Anut awan kagin ipani uyan go sen yabi idu ya, an lo Anut inñsan gudanek ilon a.

<sup>8</sup> In man gidad Anut Nanun bo man, madai isini se yan lo awa yabek kagin ilon uyan a.

<sup>9</sup> Agod saen in awa yabek kagin a lo itaot mok ilasa yan, in tamolpein ensauta awan kagin dupani dan niñedi wo patun pasek pempem san fun mok ilasa ya.

<sup>10</sup> Agod Anut in pris malan te imado wo kob ipani a, nek ibol Melkisedek igo mi a.

*Dutur sakar san ru kagin*

<sup>11</sup> Mel en ninjen o maŋ ru mubate wo iloma yen da, ak man maŋ fun mabol ilasa wo kitek muruan a. Man dugo, aŋ aloŋ pe aŋane kisaek san tia ya.

<sup>12</sup> Aŋ girek maŋau alasa san saen idaisuda ya. Ak man talpein ta fon piteŋanek pasauman ak lo Anut ru ilon lo yen dan ikubiai panaŋ san ninjen o aŋ katuk amami da. Aŋ anaŋ sakar ak ani san ta idaisuda ya, ago gug aŋ su mi aluk san ninjen o katuk amami da.

<sup>13</sup> Aloŋ uyan, enti iŋ su mi iluk o igane dan, iŋ kagin itaot san ru ninjen o iŋaon da, man dugo, iŋ nanuk mi a.

<sup>14</sup> Ak man anaŋ sakar man tamol tutubui ak sadi a, en sauta a Anut ru pempem dusuti dan lo, mel uyan ak saian ak da ninjen o ilod igire dugo dupiliani uyan san duloŋ da.

## 6

<sup>1</sup> Ago yak ninjen o id tamug tilasap, piteŋanek pasauman Kristus ninjen o yan tibiseip yen dop, tusokalik pe tamol tutubu yak sad piteŋanek lo tiladu wa. Id gamu piteŋanek pasauman ak tibiseip bag foun ak tugunai wa, kabelan id bag wagam an fon mi tugunai o tigane banau. Ru en igo ya, mateŋ san urat fidian lo id ilod ibileksap tadaŋsa san piteŋanek, id Anut ilod lo rumok ak san piteŋanek da,

<sup>2</sup> agod fulanek funfun san, tinid fo banim agane san, dumat pe fon dumasa wak, agod Anut id bitinaek lo idirad pe pempem san pani naon ipanad san, an fidian ninedi wo ta tabol na wa.

<sup>3</sup> Aria, id gamu en tamug tau a, agod Anut awok ibol tap man, id ka ago tigane wa.

<sup>4</sup> Ak dugo, tamolpein a in̄ gubak mi Anut san lil-aman in̄sad turen̄ lo isapudade yan, agod kumaen panu san binawek kawan a igane ipalug dukubiani dile yan, agod nug dupinig Awan Urgan da dutor dan,

<sup>5</sup> agod in̄ Anut san ru a dukubianig dile yan uyanan, agod in̄ madok a sumeik ipanad dan san dabai sensen dile dulon̄ la bo man,

<sup>6</sup> murnap Anut patud dupani tap, an dugo ilod isou wak i? Id talpein an ka tan̄al tamul pe ilod fon ibileksa san dal dile wak i? Man tia geig a! Man dugo, kulob en igo digane tap, an man in̄ fon Jesus aigim fo dubali da wa, agod in̄ tinin diabisa dop malak malak lo miai dupani wa.

<sup>7</sup> Tan en lo saen wei mi ui idu den san you iluk da, agod anan̄ uyanan ak tamolpein a anan̄ dupae dan niñedi wo igane ilasa tap, Anut san bar uyanan in̄ane wa.

<sup>8</sup> Gug tan en in̄ ai dudurun anda yak mi, kurkur saiak saiak mi disa tap man, tan an saian a, agod lou aman tia ya. Saen milaen tiap tan muroun bar saiak ipani dop ipitin̄ini wa. Tan en itout san man dumari wa.

<sup>9</sup> O man̄sama adi, man̄ ru an mabol bo man, man̄ an̄ niñem o igo iloma lo rumok. Melmel patun pasek san uyanan ak mi an, an̄ o ilasa wa.

<sup>10</sup> Man dugo, Anut in̄ kagin itaot tia lo, an̄anem urat agod an̄anem ilo panek, saen in̄ yan̄an lo an̄ gun adi kagin apidinai se yan, an̄ akubiai apidinai dan ile pilti san tia wa. Kagin uyanan an̄ an̄ gamu nek ago mi agane da.

<sup>11</sup> Man̄sama iloma igo won̄ a. Nek ibol kagin a an̄ lo atur sakar dan, nek ago mi an̄ an̄anem ilo rumok

mel a niŋen aŋ tinim agane dan abi awan isap, an lo dam atur sakar a. Aŋ anek anek atem urat wagai agane dop amado yaup aŋanem saen wadan ilasa wa.

<sup>12</sup> Dal amaiak lo aŋ ta ayalis na wa. Tia, aŋ dam tamolpein a Anut ilod lo rumok go, muruan lo dutur sakar dan lo, Anut san promis diŋane dan, iŋsad kulob an aŋ agam aŋane wa.

*Anut san promis san nuŋon ilasa wa*

<sup>13</sup> Saen Anut Abraham promis ipani wo ilon yen, talpein ta iŋsan yaŋan an, Anut yaŋan iriŋani dan imado man tia yan niŋen o, Anut sen yaŋan lo rumok lak na ibol go

<sup>14</sup> ago ibol, “Rumok geig, ŋai oŋ bar uyanan ŋupano wa, oŋane mala kubalan wei mi ŋiganep ilasa wa.”

<sup>15</sup> Abraham ru an ilon go sen dabai ipanig, mala nouk imado yaug saen milaen gug promis an san nuŋon iŋane ya.

<sup>16</sup> Rumok, tamol adi iŋ talpein sen ak iriŋanai dan yaŋan lo iŋaned ru dabai dupani wa. Agod saen iŋ ru lo nug dufuni dan, kulob an lo ru digane itout a.

<sup>17</sup> Ago yak niŋen o tamolpein a Anut iŋsan promis san nuŋon diŋane wan, iŋsan ilobol ibileksa san tia yan, an kuai te ikubiai dile wo ilon yen da. Amaiak niŋen o iŋ ru rumok lak na ibol an lo iŋsan promis ru dabai ipani a.

<sup>18</sup> An lo na mel uraru a tibilsa san tia yan, agod an niŋen o Anut sewak ipanad san ta isuda na yan, lo id tan suek tubun ak ipanad a, an lo id a aupasek niŋen o tasol man, melmel a naod na iganeg niŋedi wo mala naok tumado dan, tiŋanep tabi sakar oŋ a.

<sup>19</sup> Id Anut tinid tigane tupanid amaiak anga igo wonj njud yabituani da. Tini ganek amaiak dabai aman da ya, an lo iganeg id dalawan san yamel an patun fo taug galuj Gun Di, Gun Mok an ilon lo tiladu ya.

<sup>20</sup> An lo Jesus id ninjed o imug mi iladu ya. Inj man pris gurman pempem san, naok Melkisedek igo wonj ilasa ya.

## 7

### *Melkisedek yan tubun a*

<sup>1</sup> Melkisedek inj taun Salem dubol dan san kinj, agod inj Anut Naon Tubun Lak Na yan san pris imado ya. Saen Abraham yu iganeg kinj aenta ifu itout go imul an, Melkisedek Abraham ile wo yang dal na nug dileg bar ipani a.

<sup>2</sup> Agog Abraham mel fidian isini an itarpaleg malan 10 itumani, ago gug malan kisaek injaneg Melkisedek ipani. Aria, yanjak Melkisedek man fun igo ya, “kagin itaot ak san kinj,” agod inj mi Salem san kinj, an san fun man “maror san kinj.”

<sup>3</sup> Inj tinan taman tia, tubun bagen dam tia ya. Tinan igansi ak san nal, imat ak san nal dam ta talon a. Nek ibol Anut Nanun onj imado ya, inj pris pempem san imado da.

<sup>4</sup> Anj Melkisedek yanjan tubun an ale. Abraham idsad tubud baged malan inug ak, yu san biounj isini an itarpaleg malan 10 gug malan kisaek injaneg Melkisedek ipani a.

<sup>5</sup> Ru ta Moses san kubiaenj ilon lo yen dan ago ibol, Livai san malan kubulan a pris urat dijaneg

yan tamolpein sad melmel aenta diñane wa. Tamolpein an inşad biouñ ditarpalep malan 10 gug malan kisaek dipidinai a. Ago dugo gidad teid muroudi agod Abraham tubun muroun bo man dam mi a.

<sup>6</sup> Ak man tamol Melkisedek an Livai san gugoi lo kisaek tia ya, ago yak bo man Abraham biouñ itumanig malan 10 gug itarpaleg malan kisaek Melkisedek ipani a. Melkisedek biouñ an inñaneg tamol a Anut san promis yabi dan bar ipani a.

<sup>7</sup> Id talonj uyan ak tamol lak na yan bar tamol paen na yan ipani wa.

<sup>8</sup> Amaiak ninjen o dal ta igo ya, tamol e Livai san gugoi lo dilasa yan binawek diñane bo man in dumat da. Ak man dal turan lo, tamol Melkisedek in dam binawek inñane ya, gug girek en lo ibol in pempem imado yau onj da.

<sup>9</sup> Ru ta dam nap talpein ka igo ibol a, Livai inşen, tamolpein sad binawek inñane dan, gidad in gamugo ilasa bo man binawek Abraham banin lo Melkisedek ipani a.

<sup>10</sup> Man dugo, saen Abraham Melkisedek itu-mani ante man, Livai in bagen Abraham tinin lo imado se ya.

### *Jesus ibol Melkisedek onj a*

<sup>11</sup> Aria, pris adi a Livai san gugoi lo dilasa yan sad urat man kubiaenj a Anut tamolpein ipidinai an san fun. Tamolpein pris an sad urat an lo in itaot mok ak dilasa tap, anta wo pris foun ak ta ilasa wo Anut imat di? Pris naok Aron san ago tia ya, tia, Melkisedek san ago mi a.

<sup>12</sup> Aria, pris san urat awan lo bileksak yen tap man kubiaen dam lo bileksak yen a.

<sup>13</sup> Tamol a man ninen o mininen den man in gugoi senamo ak san a. Ak man talpein ta gugoi an san, pris sad urat alta fufo igane man tia ya.

<sup>14</sup> Id kuai tem talon uyanan ak idsad Tubun en man in Juda san gugoi lo ilasa ya. Agod gugoi amaiak mi ninen o Moses pris ninedi wo ru ta ibol man tia ya.

<sup>15</sup> Mel man ninen o mininen den ru binawek lo kuai isi geig a. Aloñ uyan a. Gamu pris naok sen ak Melkisedek on ak ilasa ya.

<sup>16</sup> In pris san kob inane ya, kubiaen ta gugoi dugon lo in ilasa yan lo kob ta inane na ya, tia, kumaen dipitiñini san tia yan san dabai lo mi a.

<sup>17</sup> Man dugo, ru en girek lo in ninen o ago ibol, “On pris pempem mado geig a, nek pris naok Melkisedek ago mi on dam ago wa.”

<sup>18</sup> Dal ta lo, kubiaen malan malan mi an Anut patun fo igane ya, man dugo, kubiaen an dabai an tia yak, agod nuñon an dam tia ya.

<sup>19</sup> (Man dugo, kubiaen an mel ta itaot mok ak igane ilasa san tia ya.) Dal turan lo, ilo rumok uyanan nuñon anda yak ikubiai panad a, an lo Anut siniren na tau a.

<sup>20</sup> Saen Anut ago igane yan lo inñinanen ru dabai ipani a. Pris an Livai san gugoi lo dilasa yan, talpein ta ru dabai ipani man tia yan lo gidad pris dilasa ya.

<sup>21</sup> Ak man tamol a ninen o mabol la yan Anut inñinanen ru dabai ipani an lo pris ilasa ya. Man dugo, Anut irupeig igo ibol,

“Tubud inanen ru dabai ipani la ya,  
agod in ilon ta ibilisa na wa.

On pris pempem mado geig a.”

<sup>22</sup> Fun an ninen o Jesus man kontrak foun an san balsinane, agod kontrak an kontrak wagam an irinani a.

<sup>23</sup> Pris wagam san an wei mi a, man dugo, mater yabituanai, an lo urat digane yau san tia ya. Fun an ninen o pris foun ak pris dumat ak sad abed dinane se ya.

<sup>24</sup> Ak gug Jesus man pempem imado yau da. An ninen o pris san urat man nek ago mi igane yau on a.

<sup>25</sup> Ago yak ninen o tamolpein a in lo Anut sumeik dupani dan patud ipasi pasik anen idaisuda ya. Man dugo, in pempem imado dan ninen in waged lo Anut igudani da.

<sup>26</sup> Pris gurman naok ago yak id lo uyan a. In saian aman tia ya, in gun, ikok, in tamolpein aupasek adi an sinired na dam tia ya, agod Anut yabisag kumaen panu lo lak na isuda geig a.

<sup>27</sup> Nal wei mi pris aenkadi Anut yai digane pani da, malan malan insinad aupasek dusuas san yai digane gup tinin te man tamolpein sad yai digane da. Ak man Jesus man in ago tia ya, in insen tinin amaiak ibiseig nal kisaek tamolpein fidian ninedi wo aigim fo imat a.

<sup>28</sup> Rumok, kubiaen in tamol dabai amad tia yak ipilianaip pris gurman dilasa wa. Ak man saen Anut in ru rumok lak na ibol an kubiaen an patun fo igane ya. An lo Anut ru rumok a ibol an lo, inanen Nanun ipilianig pris gurman ilasa ya. Agod

Anut inanen Nanun iganeg itaot geig ilasa ya, nek ago mi pempem imado wa.

## 8

### *Jesus idsad pris malan te ya*

<sup>1</sup> Man ru mabol dan man mel malan te igo ya: rumok, id pris gurman uyanan ago yak amad da ya. Inj kumaen panu lo Tubun Geig ak san badim sinjiren na banin won ak lo imasig imado da.

<sup>2</sup> Agod inj Anut san ubou ab rumok ak lo pris san urat igane da. Ubou ab an man tamol ta dususe na ya, tia, Anut sen mi isuse ya.

<sup>3</sup> Pris gurman fidian dipilianai dan inj tamolpein aned ilo uyan anan Anut yan an lo mel an dupani da. Agod inaned aupasek dusuas yau san mel mudan man Anut yai digane pani da. Fun amaiak ninen o gamu pris foun ak dam mel ta naon ago mi Anut ipani wa.

<sup>4</sup> Aria, inj tan en san tamol tap man inj ta pris ilasa na wa. Man dugo, pris wei mi tan en lo dumado la yan, Anut san kubiaen kagin dupani dop yai digane pani se ya.

<sup>5</sup> Ubou ab a tamol, lo Anut urat digane dupani dan man kumaen panu anen ubou ab san mitilaen igo ya. Fun amaiak ninen Moses Anut san ubou ab isuse wo igane dugo, Anut irupeig igo ibol, “Onj hai did fo na ru kagin nrupaio dugo ilo sou njukubiai pano yan lo, mel fidian gane ilasap itaot a.”

<sup>6</sup> Gug gamu pris san urat Anut Kristus banin lo igane yan man uyanan geig a. Man dugo, inj kontrak uyanan ak san titinae tamol igo ya, agod kontrak an kontrak wagam ak irinani a. Ata wo,

kontrak foun an san bag man Anut anen promis uyanan, an lo wagam an dam san nuñon irinani a.

<sup>7</sup> Kontrak wagam an lo muruan tia yak man kontrak foun ak ta ilasa san tia wa.

<sup>8</sup> Man dugo, Anut tamolpein ilod lo saian ile ya, amaiak ninen o,

“Tubun en ibol, alon ak, saen ipalu dan te dop ñai Isrel tamolpein in Juda tamolpein dadi kontrak foun ak mususe wa.

<sup>9</sup> Agod kontrak en man ñai Isrel tubud baged dadi mususe ago tia ya.

Saen an lo man ñai banid te ñibiaig ñañal go Igipta tan mubiseig mupalu ya.

Man dugo, in ñaisag kontrak an mi kagin dupanip ta diabi se na ya.

An ninen o ñai patug ñipidinai a.

Ñai Tubun en ago ñabol a.

<sup>10</sup> Saen an ilasa dop, kontrak en ñai Isrel tamolpein lo ñigane wa.

Ñaisag kubiaen an kabunad lo ñidiri wak, agod bubedi lo dam ñigire wa.

Ñai man inaned Anut, agod in ñaineg tamolpein a.

<sup>11</sup> Nal en lo ta lulunad lo turan boi, tia, tein boi, ipitenanip ibol,

‘Tubun en ulon,’ an ago ta ibol na wa.

Man dugo, in fidian ñai dulon uyanan a.

Tamol yanad tia yan, agod tamol yanad anda yan, dam fidian ñai dulon a.

<sup>12</sup> Man dugo, ñai inaned aupasek an ñupasi yau a, agod ñai in sad muruan an ilog isou san tia ya.”

<sup>13</sup> Aria, Anut kontrak foun ta ninen o in inen dan fun man in san ilo sou lo kontrak malan malan an

man wagam san a. Agod mel ta wagam an la yak, an saen katukan mi yen pe itout yau a.

## 9

### *Tan en san ubou ab lo ubou leil san kagin*

<sup>1</sup> Aria, kontrak malan malan an lo ubou leil san kubiaen yen a, ago dugo tan en san ubou ab ta dam yen a.

<sup>2</sup> Ubou ab ta dususe ya. Galuŋ malmalan an lo lam ta, badim da, agod badim an fo bret Anut naon na didirig dien dan mi ante dien da. Galuŋ an Aben Gun ak ago dubol da.

<sup>3</sup> Aria, galuŋ an patun fo man yamel dalawan te dususe ya. Yamel amaiak patun fo man galuŋ taida yen da, galuŋ an Gun Di, Gun Mok ago dubol da.

<sup>4</sup> Galuŋ en ilon lo alta ta gol nam diganeg yen da. Alta an fo man pawra mumalun bulbal ak sen nam yai digane da. Agod kunup kontrak an dam gol nam dubuluwig yen da. Kunup kontrak an ilon lo, bod gol a mana aman da yan, Aron san makud a balun foun ak idiri an dam, agod Anut san kubiaen pat aten uyan ak uraru fo na igire an dam, kunup an ilon lo dien da.

<sup>5</sup> Kunup an fufo na Anut san ilo muŋanek aben yen da, agod an gigin ananaem mi Girager san enel uraru mi mitilaed dututuŋanai an subarid duwate yang Anut tamolpein inaned aupasek ipasi yau ak san aben amaiak dutuanig dutur da. Ak man gamu mel an maŋ fun fidian mabol dop alon san tia ya.

<sup>6</sup> Mel an fidian ago digane itout a, ago gup murna pris adi galuŋ malan te yan lo diladup inaned urat awan an digane yau oŋ a.

<sup>7</sup> Ak man pris gurman mi in galuŋ tinin te an ilon lo iladu wa. In ananar kisaek ilon lo nal kisaek atem galuŋ an ilon lo iladu da. In pempem dar inane iladup inŋsinan aupasek agod tamolpein nŋŋeo lo kagin sisaiak digane na yan, dam fidian ipasi yau wo Anut ipani da.

<sup>8-9</sup> Kulob en fidian lo ru faŋan yen da. Mel an lo Awan Urgun kuai tem ikubiai tile ya, saen galuŋ malan te urat anda ago itur se man, galuŋ Gun di, Gun Mok san dalawan an itaug yen se ya. Man dugo, dalawan san yamel amaiak dal ifutani a. Galuŋ malan te man kontrak wagam san saen, an naon inane ya. Ubou leil ab an ilon lo Anut ilo uyan mel dupani dop yai digane pani se ya, ak man mel an talpein nŋtun ibinawip ikok ilasa san tia ya.

<sup>10</sup> Melmel an man sen kubiaen ibol ago anan nuaen, you lukluk agod fulanek funfun digane dop lo ikok dilasa san mi a. Kulob en man tinik fufo yak san mi a, ago digane yaup melmel foun ak dilasa wan san saen ilasa wa.

### *Kristus san dar*

<sup>11</sup> Ak man saen Kristus ilasa yan, in melmel uyan uyan a dilasa la yan, sad pris gurman oŋ ago imado ya. Saen an lo in galuŋ Gun Di, Gun Mok a uyanan geig agod itaot mok a tamol banid nam ta dususe na yan, ilon lo iladu ya. Galuŋ an tan en san tia ya.

<sup>12</sup> In nal kisaek o lian mi galuŋ Gun Di, Gun Mok an ilon lo iladu ya, agod dar a inaneŋ ida iladu yan

man bilelek boi, tia makau nanun ta boi san dar tia ya, tia, an inşinanen dar mok a. An nişen o id inşiliad tamul pe inşan na pempem tumado yau san dal ipasi a.

<sup>13</sup> Dugo, pris adi bilelek sad dar, makau nanun tamol sad dar, agod makau nanun pein ak san tatu, an dişane go tamolpein a, Anut malan lo ilod ta ikok na yan, sad tinidi fufo dufurfi go gun dilasa ya, an lo tinidi ikok ilasa tap,

<sup>14</sup> Kristus san dar sapta taida mip dabai ak i? Ur pempem san dabai lo, Kristus inşen inşanen tinin a muruan aman tia yan dufuni imat pe mel mudan yai lo digane yak igo woş Anut ipani a. Kulob an lo inşen mi idsad ņutud ibinawig ikok tilasa ya, an lo idsad ņutud lo kagin a sad nuşon a lo mateş tile dan ipasi yau a, an lo id Anut kumaen imado dak mi ubou an tile wa.

<sup>15</sup> Fun amaiak nişen o Kristus inş kontrak foun en san tamol titişae ak igo imado da. An lo talpein en-sauta a Anut ipilianai ak mi, inş kumaen pempem san melmel dişane san ipilianaig yen dan dişane wa. Man dugu, mateş a ilasa amaiak lo, tamolpein kontrak a wagam paen na dumado dugu aupasek digane na yan patud ipasi a.

<sup>16</sup> Aria, mateş kontrak san girek (pepa) ta yen tap, an man urat aman tia ya. Man dugu, tamolpein inş girek muroun imat an dile dulonş gup, girek an urat ka dupani wa.

<sup>17</sup> Kontrak girek an mateş san saen lo mi dabai anda. Man dugu, saen girek muroun malan kumaen lo imado se yan, girek an kawan igo ya.

<sup>18</sup> Fun an lo na wagam mel mudan dufu na yan sad mateş san dar amaiak kontrak wagam an

dabai ipani na ya.

<sup>19</sup> Saen Moses tamolpein naod na kubiaen an fidian ifulale idug itout an, in makau nanun bilelek da sad dar inaneg you da ibileksa ya. Ago gug yang ai hisop raen ta kam daran ak bilelek fufulun sen nam dufou yan inaneg dar lo isamuni, ago gug inaneg ifurfi buk fo na isida gug fon tamolpein fidian sad na ifurfi yau a.

<sup>20</sup> In ago irupidai, “Dar en kontrak dabai ipani san, nek emaiak ninen o Anut ru kagin ipanaj a.”

<sup>21</sup> Kulob nek a igane ago mi dar an ifurfi ubou ab an fo isudag, ubou leil san mel an dam fidian fo ifurfi isuda ya.

<sup>22</sup> Rumok, kubiaen paen na, mel wei mi dar nam ikok digane ilasa ya. Agod dar ta ikulmaek yau na yak man aupasek dam ta isuas yau na wa.

<sup>23</sup> An uyan ak kumaen panu san melmel anen mitilaedi an naok naok ago lo ikok dilasa da. Ak man kumaen panu san melmel in sedi, naok naok a aenta irinanjai dan nam ikok dilasa da.

<sup>24</sup> Man dugo, Kristus in tamol banid nam galun gun mok dususe yak lo ta iladu na ya. An man galun mok ak san tutunanek mi a. Tia, kumaen panu mok lo iladu ya. Gamu ante id ninjed o Anut naon na imado da.

<sup>25</sup> Taida mi, in saen wei mi in sen tinin ipani wo igane man tia ya, nek ibol pris gurman galun Gun Di, Gun Mok ak lo anajar kisaek kisaek lo dar a in san tia yan da isinip iladu dan ago ta igane na ya.

<sup>26</sup> Ago tap, saen Anut tan en igane ilasag ipalu an lo Kristus nal wei mi madai ile wa. In ago ta igane na ya, tia, nal kisaek o lian saen wadan lo ilasa ya.

Injsinanen tinin ipidinai an lo aupasek ipasi yau san igane ya.

<sup>27</sup> Anut ibol, tamolpein nal kisaek mi dumat a, ago gup Anut naon na bitinaek lo dutur a.

<sup>28</sup> Nek ago mi, Kristus dam nal kisaek dufuni imat a, an lo tamolpein wei mi sad aupasek isini a. Inj ago igane dugup afon imul ipalu da wa. Aupasek isuas yau san ta imul ipalu da, tia, tamolpein a inj o mala nouk dumado dan patud ipasi ipidinai o imul ipalu da wa.

## 10

*Yai niganag wagam man aupasek ipasi san tia ya*

<sup>1</sup> Kubiaen man mel uyan uyan murna dilasap dupalu wa, amaiak sad mitilaedi mi a. An man mel nunjon tia ya. An lo tamolpein Anut ananjar fidian yai naon kisaek anam digane pani dugo sinjiren na diau dan, kubiaen ikubuniaip itaot mok dilasa san tia ya.

<sup>2</sup> Dugo, kubiaen tamolpein itaot mok idirai dilasa la tap, Anut yai digane pani se yan afon digane da wak i? Man tia geig a. Fun an ninjen o, ubou leil san tamolpein saen kisaek atem ikok mok dilasa pasik tap, ilod lo aupasek ta afon dukubiani san tia ya.

<sup>3</sup> Ak man tia, insad yai niganag en man ananjar fidian ago digane dop lo inaned aupasek an ilod isou da.

<sup>4</sup> Man dugo, makau tamol ak inj bilelek da sad dar man aupasek ipasi yau san tia ya.

<sup>5</sup> Fun an ninjen saen Kristus tan na ipalu yan Taman irupeig ago ibol,

“Inj onj yai digane dupano wo, agod lou kawan ak dupano wo do umoi a.

Ak man tinik ta onj gubak mi kubuneg naj panag a.

<sup>6</sup> Onj tamolpein nao na dilasa san yai niganag, agod aupasek isuas san mudan dam ninedi wo bube ta uyan na ya.

<sup>7</sup> Agog naj nabol, ‘O Anut mala ipalu, naj ebo ya, nek ibol Anut san ru girek buk lo ninjeg o ibol ago mi a,

nai man onjane ilobol njigane wo njupalu ya.’ ”

<sup>8</sup> Aria, malan malan inj ago ibol, “Tamolpein inj onj ninje wo yai niganag, lou kawan an, mudan tinid fidian dimari dan, agod aupasek san yai niganag digane dan ninedi wo fidian umoi da.” (Gug kubiaen ibol kagin naok an tamolpein ago digane wa.)

<sup>9</sup> Inj ru awan ibate dag ibol, “Nai ebo ya, naj man onjane ilobol njigane wo njupalu ya.” An lo na inj dal wagam an ipasi yau dugo dal foun ak aben lo igane ya.

<sup>10</sup> Agod ilobol an lo, Jesus Kristus saen kisaek o lian injsen tinin dufuni imat san o Anut ipani a, an lo id gun tilasag tumado da.

<sup>11</sup> Nal kisaek kisaek atem pris dumasa dutur pe yai ganek aben na injsinad urat awan saen wei mi digane da. Inj mel mudan naon kisaek an mi nal pempem Anut yai digane pani da. Ak man yai ganek naok an tamolpein sad aupasek ipasi yau san tia ya.

<sup>12</sup> Ak man Kristus nal kisaek mi lo sen tinin Anut ipani a. Kulob an nunjon pempem yen da. Saen kulob an igane itout man yaug Anut banin won ak lo imasig imado da. Man dugo, injsan urat itout a.

<sup>13</sup> Gamu in mala naok imado yaup saen Anut inſan ager adi dabai amad tia yan injal pe njen paen na idiraip dumado wa.

<sup>14</sup> Man dugo, in saen kisaek mi sen tinin Anut ipani an lo, tamolpein a gun idirai dilasa dan ikubuniaig itaot mok pempem san dilasa ya.

<sup>15</sup> Awan Urgan dam mel an njen o ikubiai ipanad go ago ibol,

<sup>16</sup> “Saen an ilasa dop, kontrak en nai Isrel tamolpein lo njigane wa.

Naisag kubiaen an bubedi lo njidiri wak, agod kabunad lo dam njigire wa.”

<sup>17</sup> Agog in ru awan ibateg ibol,

“Nai inſad aupasek agod inſad kagin saiak saiak dam ilog isou san tia ya.”

<sup>18</sup> Amaiak njen o, saen kulob an Anut isuas yau tap, aben ante aupasek san yai niganag taida yen man tia wa.

### *Tatur dabai san ru kagin*

<sup>19</sup> Fun an lo na, teig taog, id Jesus san dar lo Anut san galun Gun Di, Gun Mok an ilon lo tiladu wo tarer san tia ya.

<sup>20</sup> Dal a tiladu san an foun, agod kumaen yen yau san a. Yamel an id tiladu san dal ifutani a, ak man Jesus lo yamel an isireig dalawan id ipasi panad a. Yamel an inſen tinin amaiak naon inane ya.

<sup>21</sup> Agod id pris tubun malan te yak amad da ya, in Anut anen tamolpein an fidian kagin ipidinai da.

<sup>22</sup> Fun uraru an njen o id Anut sinjiren na ilod sinjakan mi tau a. Agod idsad ilo rumok idaisuda amaiak njen o injiliad san o tinid tigane wa. Idsad

ilo sou saian saian an tinjanep inŝan na tau, ago gup Kristus san dar ifurfip idsad ilo sou saian saian an isuas yau pasik a. Agod idsad tinid an you uyan ak lo ifulanip ikok ilasa wa.

<sup>23</sup> Id Anut injiliad pe kumaen panu lo, in da tumado wak san ilo rumok an niŝen tamolpein turupidai duloŝ dan ta tabip ila iso na wa, tia, tabi sakar pe itaot yen a. Man dugo, Enti a ru ibol panad an, inanen promis ru nuŝon igane ilasa wa.

<sup>24</sup> An niŝen id nug ilo sou tupanip nug tisuusani dop nug niŝen tamat dop urat uyan uyan ak tigane ilasa wa.

<sup>25</sup> Aenta ubou leil san kagin sisem dutumani san o dumoi da, ago gug id kagin an ta tagam tinjane na wa. Tia, aŝ tan suek ru nug apani wa, Tubun en imul ipalu san Nal sumeik ipanaŝ o ale dugo, kagin naok ago yan aŝ luluŝam lo agane ilasap tubun a.

<sup>26</sup> Id Kristus san ru rumok taloŝ la gug id aupasek tigane ilasa woŝ dan, id o mel uyan ak taida yen pe lo idaned aupasek ipasi yau san tia ya.

<sup>27</sup> Tia, tarut tarer dop, lo malad tigane dop tumado wa, man dugo, Anut san bitinaek agod yai wananan a inŝan ager imiriaŝ inanaŝ yau san idsad na dam ago ilasa wa.

<sup>28</sup> Talpein enti Moses san kubiaeŝ patun ipani dugo tamol uraru boi, tia utol boi, inŝan kagin an malad nam dile tap, tamolpein fidian dufuni imat a, agod in ilo muŝanek ta dupani na wa.

<sup>29</sup> Amaiak niŝen o dugo, talpein Anut Nanun yaŝan ipare idu dop, kontrak san dar a iganeg gun ilasa yan mel kawan ago ile dop, ilo panek san Ur an awan nam saian ipani a, ago tap, muruan

tubun geig ak sapta taida Anut ipani wak i?

<sup>30</sup> Man dugo, id talon uyan ak talpein a igo ibol, “Naon panek man naineg a, nai gubun an nukubune wa.” Agod afon, “Tubun en inanen tamolpein bitinaek lo idirai a.”

<sup>31</sup> Rumok, Anut kumaen pempem san banin lo tau tadu tap, an tarut tarer san mok a.

<sup>32</sup> An saen gubak mi lilaman ananeg, an lo atur sakar dugo muruan funfun tinim fo ipalu dugo asini na yan, an ilom isou uyanan a.

<sup>33</sup> Saen aenta lo an malak malak dugunan pe naom dufuteg dumisilanan dop muruan dupanan se ya. Agod saen aenta man an aenkadi in luad te dida atumanig, muruan nek ago mi saian geig ak dupidinai se yan, an dida asini na ya.

<sup>34</sup> An tamolpein a subanek ab lo dumado dan sad na au dop ael se ya. Agod saen an sam filiam dusu diau dop an ilo uyan lo mi aelafu on se ya. Man dugo, an alon ak ananem mel uyanan ak man kumaen panu lo yen da, an mi pempem yen a.

<sup>35</sup> Fun an ninen o ananem tini ganek Kristus lo yan abal yau amoi. Man dugo, Anut mel an naon tubun ak ipanan a.

<sup>36</sup> An atur sakar on amado dan uyan a. An lo na Anut san ilo ibol ari dop mel a in ipanan o ibol an anane wa.

<sup>37</sup> Man dugo, Anut ru igo ibol,  
 “Saen katukan en yau dop, talpein ipalu wo igo  
 yan ipalu ririan a,  
 agod in saen ibidani san tia ya.

<sup>38</sup> Gug naisag tamol itaot an ilo rumok lo mi imado wa,

gug in isuk imul tap, naisag n̄utug lo in o man ilog ta uyan na wa.”

<sup>39</sup> Ak man id tamolpein a dusuk dumul pe daon diñane dan sad tia ya. Tia, id man tamolpein a ilo lo rumok, an lo in̄aned n̄utud dida kisaek mi dumadop lo daon ta dile na dan nek ama ya.

## 11

### *Ilo rumok lo mi a*

<sup>1</sup> Aria, ilo rumok man igo ya, mel a ninen o tinid tiganeg tumado dan id talon ak an ilasa wa, agod mel a ta tile na yan ninen o ilod rumok a.

<sup>2</sup> Ilo rumok an lo tamol wagam dumado na yan malak malak lo Anut per ipidinai a.

<sup>3</sup> Ilo rumok lo mi, id talon ak Anut san wagin lo mel fidian idirai dilasa ya, an lo mel tile anen tia yan lo Anut iganeg idirai dilasa ya.

<sup>4</sup> Ilo rumok lo mi, Abel Anut yai uyanan igane pani, agog Kein san irinani a. In̄san ilo rumok amaiak lo Anut in̄ yanan yabisag tamol itaot ak ibol a. Anut in̄san yai ganek an uyan ipani an lo ikubiai panad, in̄ tamol itaot a. Agod ilo rumok nek an mi lo, gidad in̄ imat la bo man, gamu id ru irupaiad on da.

<sup>5</sup> Ilo rumok lo mi, Anut Inok tan en lo ipasig kumaen panu na in̄ane yau, an lo mater̄ ta ile na ya. Agog Enok naon tan en lo ta dile na ya, man dugo, Anut in̄ane yau a. Gamugo in̄ane yau se man, Anut in̄ o ilo uyan yen dan ago irupidai a.

<sup>6</sup> Rumok, ilo rumok a tia man Anut ilo uyan pani san ta idaisuda na ya. Man dugo, talpein enti Anut sinjiren na yau o dop, malan malan mi Anut imado

onj dan o ilon rumok a, agod injen amaiak talpein inj o abanj ile dan naon ipani wa.

<sup>7</sup> Ilo rumok lo mi, Noa Anut san ru kagin panek ilonj a, an lo gidad mel an ta yil na ya, ak man Anut san awan aban an irig kagin ipani dugo wog tubun geig ak ifoug, ate inanen tamolpein ibinawai a. Inj ago igane an lo tan san tamolpein patud ipidinaig inaned aupasek iganeg walal te ilasa ya, agod ilo itaot an man ilo rumok igane ilasa dan anen muroun ilasa ya.

<sup>8</sup> Ilo rumok lo mi, Abraham Anut san wagin ilonj go inanen panu ibiseig tan foun an san muroun ilasap imado wan ate Anut ikubiai panig yau a. Inj gidad tan an ta ilonj na yak gug Anut awan irig ate yau a.

<sup>9</sup> Ilo rumok lo mi, inj tan a Anut ipani wo irupein ante yang san muroudi sinjired na dida dumado ya, nek ibol tamol gol imado wonj a. Aisak inj nanun Jakob da nek dal kisaek an mi lo Anut san promis dam diabi a. Agog inj Aisak Jakob da sisem sel ab lo dumado na ya.

<sup>10</sup> Man dugo, inj ilo isou imug iganeg yau dan, taun tubun ak lo bag ila iso san tia yan te yau o da. Taun an san ab susek tamol man Anut mi a.

<sup>11</sup> Ilo rumok lo mi, Abraham gidad tubun bagen dilasa pasik go Sara dam niganig, ak man Anut Abraham nanuk foun ak taman ilasa san o dabai ipani a. Man dugo, Abraham san ilo rumok igo ya, enti a promis ipani an san njinenj an kagin ipani wa.

<sup>12</sup> Amaiak njinen o tamol a kisaek lo mi, amaiak imat o igane bo man, inj tubun bagen dilasag ibol patui lak na teil dak igo, agod lonj na lul igo wonj a. Ago man tusuti san tia ya.

<sup>13</sup> Tamol en fidian ilo rumok lo dumado yaug dumat a. Inj Anut anen promis ru irupidai an nujon ta diņane na ya. Tia, inj ibol asau mi dutur dugo malad yaug dile dugo an niņen o ilodi uyanan ak igo ya. Agod tan en lo inj nek ibol tamol gol boi, tia, tamol naod senamo boi, igo woņ dubol dugo dumado na ya.

<sup>14</sup> Tamolpein ru ago dubol man kuai tem dukubiai panad ak inșigned panu foun ta niņen o aban dile da.

<sup>15</sup> Inj tan a dubusei la yan niņen o ilod isou ak man saen idaisuda yen dan lo inj ka dumul diau a.

<sup>16</sup> Ak man tia, inj tan senamo ta a dibisei la yan iriņani dan niņen o dumat da, an man kumaen panu san mi a. Amaiak niņen o Anut tamolpein a inj niņen o inșad Anut ago dubol dan, inj niņedi wo miai ta ifuni na da. Man dugo, inșaned taun tubun ak ta ikubuneg yen da.

<sup>17</sup> Ilo rumok lo mi, Anut Abraham bitinaek lo igane dugo Abraham Anut awan yabig, nanun Aisak yai igane pani a. Tamol en inj Anut san promis iņane yak gug, inj nanun kisaek mok an Anut yai igane pani wo igane da.

<sup>18</sup> Ak man nanuk an niņen o Anut Abraham irupeig ago ibol, “Njai Aisak kob nupani an lo inj tinin lo gup, oņane bage murou sad dar wei mi dilasa wa.”

<sup>19</sup> Abraham inj ilon lo Anut Aisak mateņ lo ifufuni yabisa wak ago ibol a. Ago yak niņen o id mitilaen an niņen ago tabol, Abraham nanun Aisak mateņ lo iņane da ya.

<sup>20</sup> Ilo rumok lo mi, mel a murna dilasap diņane wan niņedi wo Aisak bar Jakob inj Esau da ipidinai

a.

<sup>21</sup> Ilo rumok lo mi, Jakob imat o dugo Josef nanun muroun kisaek kisaek bar ipidinai a. Inj sinanen makud fo kabunan isoluwig igudani a.

<sup>22</sup> Ilo rumok lo mi, Josef san saen wadan sumeik ipani dugo Isrel tamolpein saen a inj Igipta tan dubuseip dilasa san ninjen o injanen tatu an dugon te digane wak san ru kagin irupidai a.

<sup>23</sup> Ilo rumok lo mi, Moses ilasag saen katuk imado gug tinan taman dijane diaug dimianig kalam utol imado ya. Man dugo, inj dile yak man malad lo uyanan mok a, agod kin san ru dabai anda yan ninjen o dam ta direr na ya.

<sup>24</sup> Ilo rumok lo mi, Moses saen tamol igane man inj Farou nanun pein san nanuk ago dubol man imoi a.

<sup>25</sup> Inj gidad Anut anen tamolpein dadi Igipta paed na muruan isini wo igane ya. Inj tan na saen katuk an mi aupasek igane dop sen ifutuwi man imoi a.

<sup>26</sup> Inj misilanek Kristus yanjan ninjen o ile man Igipta sad bala filian an fidian irinjani pasik an ibol a. Man dugo, inj san ilo isou imug yau an lo inj san urat naon ile ya.

<sup>27</sup> Ilo rumok lo mi, kin san tinj ae saiak o ta irer nag Igipta ibiseig yau. Man dugo, enti a id tile wan tia yan inj ile yak igo an lo itur sakar na ya.

<sup>28</sup> Ilo rumok lo mi, inj Pasova nal an san kulob an yabituani dugo dar ifurfi a, an lo enjel ager san ta Isrel sad nanuk matu ak irinj anai dugo yang Igipta sadi an mi ifu dumat a.

<sup>29</sup> Ilo rumok lo mi, Isrel adi beig daran ak titinjaem dudug ibol tan aten igos ak ate diau wonj

a, ago gug Igipta adi nek dal kisaek an mi lo digane wo dugo disarir dudu diaug you duluk go dumat a.

<sup>30</sup> Ilo rumok lo mi, Jeriko panu san ar pat nam dufou itilani an, nal 7 Isrel adi ditilianig ditor an lo ar an sen ibilani yau idu ya.

<sup>31</sup> Ilo rumok lo mi, jeit pein Rahab, ilo maror lo abanj leil tamol adi uyan ipidinai an ninjen o, panu an san awa parsisalek adi luad te ta dufuni imat na ya.

<sup>32</sup> Agod gamu fon ηai dugo ηabol aki? ηai Gidion, Barak, Samson, Jepta, Dawid, Samuel agod profet adi dam ninedi wo ηabol san saen tia ya.

<sup>33</sup> Tamolpein amaiak in Anut ilod lo rumok a. An lo na in kin aenta dibiai dudu dak, aenta tamolpein kagin dipidinai dak, agod aenta in Anut mel ipidinai o ibol an diηane da. Aenta inaned ilo rumok an lo na in laion awad dufutani da.

<sup>34</sup> Aenta yai balen tubun mi ided dan digane imat dak, aenta dusol dop sabiri nam dufu dumat san tia ya. Ilo rumok an lo, aenta in dabai amad tia bo man dabai diηanep, yu lo inaned ager aben senamo ak san an dibiai dudu se ya.

<sup>35</sup> Pein inaned nanuk dumat an ilo rumok lo profet inaned nanuk an ifufunai dimasag diηane ya. Aenta dufu malad dusue yan malak malak sed kuai te idirai dilasa man dumoi a, man dugo, mitep mateη aben lo dumasa gup madok uyanan ak inηad tureη tan en lo iriηani an dile wa.

<sup>36</sup> Aenta kukok ad digane dugo, aenta dusukutai dugo, aenta sein nam banidi dususeg diriai sub-anek ab lo diau a.

<sup>37</sup> Aenta pat nam dufu dumat dugo, aenta soa nam dututeg ananaem dilasa dugo, aenta bainat

nam dufu dumat. Ilo rumok tamolpein an bilelek sunulon an tinid nam dubuluwig dutor da, in melmel ad tia agog tamolpein saian dupidinaidugo malad dusue na ya.

<sup>38</sup> Ilo rumok tamolpein an aben igosan ak lo, did lo gidigheid dutor dugo, gib did fun te agod gib tan ilon lo an lo njon diabi se ya. Tan en san tamolpein dida dumado san ta idaisuda na ya.

<sup>39</sup> Tamolpein an fidian inaned ilo rumok ninen o Anut per ipidinaia. Ago igane bo man insad kisaek ta Anut promis ru ibol an lo mel an ta inane man tia ya.

<sup>40</sup> Man dugo, wagam mok Anut mel ta nen uyanan ak idsad saen an lo ilasa wan ile ya. An man tamolpein an id tia yak man itaot dilasa san tia ya, tia, in id da sisem itaot tilasa wa.

## 12

### *Anut insan nanun muroun bu ipidinaida*

<sup>1</sup> Fun an ninen o ilo rumok tamolpein adi dumat la yan nek ibol doup malan tubun ak ta dilasap kukok dile dak ago id ditilianad dulubanad go dutor da. An lo id insad kagin dutor sakar san an tagam a. Fun an ninen o id muruan in aupasek da tinid lo ibiagatad go yen dan fidian tabi yau a. Ago dop id ilod kisaek sed dabai ipanad pe dal an fo Anut tom idiri panad an lo mi tumaspalup taup tom wadan an fo tisida wa.

<sup>2</sup> Id fidian malad yaup Jesus tile, in mi idsad ilo rumok fun a, agod murnap in mi idsad ilo rumok an iganep itaot mok ilasa wa. In aigim an san muruan ileg an patun ta ipani na ya. Tia, in murnap Anut ilo uyan tubun mi ipani wan ninen

o aigim san miai an man mel kabelan igo wonj ile ya. Ago yak ninjen o gamu inj Anut banin won ak ate yanjak tubun ak injaneg imado da.

<sup>3</sup> Ilom isou uyanan, aupasek adi dumisilani dop muruan funfun tinin fo digane se ya, ago yak man inj itur sakar a. An ninjen o kabelan anj ilom iyalis dop ilom idu banau.

<sup>4</sup> Rumok, anjam aupasek an da nug afuni da, ak man wagai agane dan lo anjam dar an gamugo ikulmaek da.

<sup>5</sup> Agod en dugo, anj Anut ru kagin a irupaian na yan lo injsan nanun muroun ago ibol an ilom injaonj di?

“Nai nanug, Tubun en bu ipano dan kabelan mel kawan ubol banau, agod an ninjen o onj ilo idu umoi. Man onj mel gane saian amaiak ninjen o naon bu ipano da.

<sup>6</sup> Man dugo, Tubun en inj talpein ninjen o imat mok dan ru kagin irupeidak, agod talpein a inj nanun muroun igo wonj injal dan bu ipidinai da.”

<sup>7</sup> Kagin ipitejanan san ninjen o muruan lo atur sakar a. Inj ago igane dan lo injsan nanun muroun igo wonj kagin ipananj da. En dugo, nanuk ta lulunjad lo imado dan injsan taman bu ta ipani na i? Man tia geig a.

<sup>8</sup> An ninjen anj Anut bu ta ipananj dop man, anj injsan nanun muroun tia ya, tia, anj man jeit kagin san nanuk mi igo wonj a.

<sup>9</sup> Fon taida mi, id fidian tamad muroud bu dupanad da, agod id an ninjen o ilod ta saian da. Tia, kulob amaiak ninjen o id injaned awadi turi da. Ak

an ago tap, id dam idsad ur san Tamad an awan paen na tumado dop an lo kumaen tumado wa.

<sup>10</sup> In sed ilod ibol ak lo saen katukan en lo mi bu dupanad da. Ak man Anut id ibinawad uyanan san niŋen o mi bu ipanad da, man dugo, nek ibol in gun imado dak ago mi id dam gun tilasa wa.

<sup>11</sup> Talpein bu inane dak saen an lo in madai ilon da, an man sinjakan tia ya. Ak man mite dugup amaiak tamolpein an kagin a lo dal ipitenanai la yan ilod lo nuŋon igane ilasa da. Nuŋon an man ilod itaot a, agod ilo maror amad da wa.

<sup>12</sup> Amaiak niŋen o an banimi imagor dan abisa wa, agod turumi dabai tia yan dabai apani wa.

<sup>13</sup> Niemi aten san dal itaot an akubune wa. An lo an niemi akupakip on ator dan san batek an ta ifurati na wa, tia, niemi an uyan ilasa wa.

### *An Anut awan ta aparsisali san ru kagin*

<sup>14</sup> An tamolpein fidian dadi ilom kisaek san maror lo mi amado ator, an niŋen o dabai agane wa. Agod gun alasa wo an dam yaes ifunan a. Talpein enti ago ta igane na tap, Tubun en ile san tia wa.

<sup>15</sup> Kagin agane, kabelan talpein ta an luluŋam lo Anut anen ilo panek ipanan an yabigule banau. Kabelan talpein ta, dulun gigen ak igo an luluŋam lo isap, an lo talpein fidian bubed igane saian banau.

<sup>16</sup> Talpein ta jeit kagin ta igane na wa. Tia, ta ibol Esau igane ago Anut awan ta iparsisali na wa. In anan kabelan a tein bakan ak san na inane yan niŋen o inanen nanuk matu ak san bar ibidani yau

a, kabelan an dam nek ago mi Anut patum apani banau.

<sup>17</sup> Man dugo an alon ak, murna gug inanen matu san bar a ibidani yau an fon inane wo igane ya, ak man Anut patun ipani a. Ago dugo in tinan igane bo man ilon ibileksa san dal ta ile man tia ya.

<sup>18</sup> Ak man nek ibol Isrel sad tubud adi did Sinai na dile yak igo won mel naok en an ta sumeik apani na da: did a diabi dile o Anut naod ifutani an, yai balen tubun mi imasa dan, tidom tubun geig an, duwadau ifure dan,

<sup>19</sup> tour ilinan dan, agod awak ta man tamolpein a dulon an ru taida irupidai imoi o ago dumosiai an, mel naok ago yan sad na an ta apalu na da.

<sup>20</sup> Man dugo, ru kubiaen a ibol ilasa yan kudu-dod lo madai ipidinai saian mok a. Agod ibol, “Gidad mel mudan ta did en yabi ile tap, pat nam afunip imat a.”

<sup>21</sup> Rumok, aban a ile yan san naon man urer san mok igo ya, an lo Moses ago ibol, “Nai narut go narer saian mok da.”

<sup>22</sup> Gug an did Saion fo na apalu ya, Anut kumaen imado dan san panu Jerusalem o keit lak na yen dan lo apalu ya, agod aben an lo man enel malan tubun pempem yousai lo mi dumado da.

<sup>23</sup> An Anut san nanuk matu matu ak yanad buk lo igireg yen dan sad midaen ilon lo aladu ya. An Anut a tamolpein fidian sad bitinaek tamol an san na apalu ya, agod tamol itaot ak sad ur Anut idiraig itaot mok dilasa yan dam sad na apalu ya.

<sup>24</sup> An dam Jesus san na apalu ya. Insen amaiak kontrak foun ak san titinae tamol igo ya. Abel san dar in naon panek o Anut iwagin a, ak man Jesus

san dar a dufurfi an lo Anut san ilo panek o iwagin da, nek dar amaiak lo inſan na apalu ya.

<sup>25</sup> Kagin agane, enti in ininon dop awan ta aparsisali na wa. Tamol a tan en lo ru kagin irupidai dugo awan duparsisali na yan lo, muruan an dirinani man tia ya. Aria, Enti a kumaen panu lo imado dugo ru kagin irupaiad dan, id inſan awan tiparsisali tap, tasol tau san tia geig a.

<sup>26</sup> Saen Anut did Sinai fo idu yan lo inſan wagin tan iganeg itugurer a. Ak man gamu in promis ru igo ibol, “Nai afon nal kisaek taida mi tan en nuguri wa, tan mi tia, tia, mel fidian lak na agod tan en dam sisem nuguri wa.”

<sup>27</sup> Ru a “afon nal kisaek taida mi” an fun man, mel a iguri an ipasai yau a. An man mel a fidian fun lo idirai dilasa yan itout yau pasik a. An lo melmel a talpein ta iguri san tia yan ibisawaip pempem dien a.

<sup>28</sup> Amaiak ninon o id aban a tamol ta iguri san tia yan ilon lo idsad kin kagin ipanad dan tinane ya. An ninon o id ilod uyanan a. Agod id kagin tiganep tarut dop ubou a Anut ilo uyan tupani san an mi tile wa.

<sup>29</sup> Man dugo, idsad Anut man ibol yai balen ided pe mel fidian inantiti yau dak igo ya.

## 13

### *Ru kagin san wadan*

<sup>1</sup> An kisaek kisaek pempem teim taom igo won nug ninon o amat a.

<sup>2</sup> An tamolpein asau ak anjal anſam ab lo apalu san ta ilom inanon na wa. Man dugo, wagam

tamolpein ta kagin an digane dan lo enel inşad ab lo kagin dupidinai uyanan gug ta duloŋ na ya.

<sup>3</sup> Anj ilo rumok tamolpein a, subanek lo dumado dan ilom isou dop amado wa, nek ibol anj dam dadi subanek ab lo amado dak igo woŋ a. Tamolpein a aenta saian dupidinai dan, an dam ilom isou wa, nek ibol ansem inşad muruan asini dak igo woŋ ago abinawai a.

<sup>4</sup> Nug iwon ŋanek lulunam lo man gun ilasa wa, nug iwon ŋanek san badim an nun aman tia wa. Man dugo, Anut jeit adi inj talpein a nug iwon ŋanek malan dusue dam bitinaek lo idirai a.

<sup>5</sup> Anjanem turenj lo moni niŋen o yaes ta ifunanj na wa. Anj mel dugon am da yan, nek an idaisuda yak igo ilom isou wa. Man dugo, Anut wagam ago ibol, “Onj tini gane panag tap, ŋai onj patug ta ŋupano na wa, agod onj ŋibisawo san tia wa.”

<sup>6</sup> Fun amaiak niŋen o, ru e id tabol ilasa den man ru rumok a, “Tubun en man ŋaisag binawek, an niŋen o mel ta wo ŋai ta ŋarer na wa.

Dugo, tamol ta mel ta lo dam ŋai ifunag san idaisuda yak i?”

<sup>7</sup> Anjanem gurman Anut anen ru durupaianj na yan ilom isou. Inşad kagin naok naok san nuŋon uyanan kuai isi a, an mi ilom isou wa. Agod inşad ilo rumok anj dam anjanep abi wa.

<sup>8</sup> Jesus Kristus ta ibiliso ibilila na wa. Tia, wagam mi, gamu en, agod pempem mi dam nek ago mi imado yau a.

<sup>9</sup> Pitenjanek funfun a, agod pitenjanek naon sen ak san dam lo anj ilom injane dop adeg au banau,

an amoi. Mel ta ilod dabai ipani san man Anut anen ilo panek mi a. Id anaŋ dugon tani san ru kubiaen funfun lo bubed dabai ipanad san tia ya, agod tamolpein a anaŋ san geg duri dupani dan, in dam ibinawai san man tia ya.

<sup>10</sup> Id ilo rumok tamolpein alta amad da ya, an fo man talpein a Juda sad ubou ab lo urat digane dan, anaŋ diŋanep diani san man Anut kob ta ipidinai na ya.

<sup>11</sup> Man dugo, nek ibol mel mudan san dar pris gurman banin lo inaneg aupasek isuas yau o galuŋ Gun Di, Gun Mok ak lo iladu yau a, ago gug inanen tinin panu patun fo dumari igo woŋ,

<sup>12</sup> nek ago mi Jesus dam, inŋsinanen dar nam tamolpein gun idirai dilasa wo panu san dalawan patun fo madai ile ya.

<sup>13</sup> Amaiak niŋen o id dam panu en tibiseip kuai te tilasap misilaneŋ in isini an id dam tisini wa.

<sup>14</sup> Man dugo, tan en lo man id panu ta saen milaen mok yen dak tile man tia ya, an niŋen o id panu a pempem yen amaiak aban an tile dop tumado da.

<sup>15</sup> Amaiak niŋen o Jesus lo, id pempem Anut per tupani wa, an idsad yai ganek Anut tupani dak igo ya. An man awad a inŋsan yaŋan niŋen o tabol ilasa dan san nuŋon rumok ak mi a.

<sup>16</sup> An kulob uyan uyan a agane dan, agod tamolpein aenta abinawai o ilom ta inaoŋ na wa. Man ata wo, yai ganek naok ago yak Anut niŋen o imat mok da.

<sup>17</sup> Ananem gurman awad paen na amado dop in dubol ago agane. In an nŋtumi kagin dupani da, ago dop murnap Anut in urat dugon digane an

naon sumiaek lo idiraip nuḡon ile ilon a. An in awad paen na amado tap man, in yousai lo mi urat digane wa. Kabelan an muruan apidinai banau, man dugo, an ta ibinawan na wa.

<sup>18</sup> An man niḡema wo Bai Anut agudani wa. Man ata wo, man mukubiani dak mananem ilo girek an Anut malan lo itaot a, agod mel fidian lo kagin uyanan ak mi migane wak ago iloma lo yen da.

<sup>19</sup> Nai an tubun mi ago agane wo ḡususunan da, an lo Anut ririan ḡai idinag pe an sam na ḡupalu da wa.

<sup>20</sup> Aria, maror san Anut amaiak, kontrak pem-pem san an san dar lo, bilelek sad titianek malan te yan, Jesus idsad Tubun en, maten lo ifufunig yabisa da yan,

<sup>21</sup> yu san biouḡ uyan uyan ak urat lo dabai ipanan san an fidian ipanan a, an lo na inanen ilobol agane itaot a. Ago dop mel dugon in san malan lo ilo uyan ipani dan an ilom lo igane ilasa wa. An man Jesus Kristus san dabai lo igane ilasa wa, inanen yanjan dam id pempem tabisa wa.

<sup>22</sup> Teig taog, tok abol pe amado dop kududom agurep ru kagin en alon uyan o ḡusumianan da, man dugo, ru en katukan mi ḡigire ya.

<sup>23</sup> Id teid Timoti subanek lo dupasi amaiak da alon o ḡabol da. An niḡen o in ipalu kisaek dop man niḡanep da mupalup milian a.

<sup>24</sup> Mananema ilo uyan ru ananem gurman adi, ilo rumok adi aenta dam arupidai dop dulon a. Ago dugo tamol ensauta Itali na dupalu yan, dam inaned ilo uyan ru an sam na digane ipalu ya.

<sup>25</sup> Bai Anut anen ilo panek an da pempem amado wa. Rumok.

**Anut san bilalug foun**  
**The New Testament in the Takia Language of Papua**  
**New Guinea**  
**Nupela Testamen long tokples Takia long Niugini**

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

---

PDF generated using Haiola and XeLaTeX on 18 Mar 2025 from source files dated 31 Aug 2023

757b3e4e-2023-5b45-893a-ee9294ddeb9d